

07/04/1997

Pegangan umat Islam Asia Tenggara kukuh

KUALA LUMPUR, Ahad - Kesedaran Islam di kalangan ummah Asia Tenggara membolehkan Islam berjaya mempertahankan keutuhan dan prinsipnya dalam menghadapi cabaran hasil pembangunan dan pertumbuhan ekonomi masa kini.

Ketua Pengarah Institut Kefahaman Islam Malaysia (Ikim), Datuk Dr Ismail Ibrahim, berkata umat Islam Asia Tenggara tetap menganggap nilai dan etika Islam sebagai asas kepada kewujudan manusia, meskipun menikmati pertumbuhan ekonomi dan pembangunan.

Katanya, umat Islam di rantau ini juga tidak memegang kepada fahaman sekular meskipun mengalami proses industrialisasi dan urbanisasi secara besar-besaran.

Malah, menurutnya, proses urbanisasi dan industrialisasi menggerakkan umat Islam untuk berpegang lebih teguh kepada ajaran agama.

"Majoriti umat Islam juga tetap memberi hak kepada golongan minoriti bukan Islam dan melindungi kepentingan mereka dan ini membolehkan masyarakat Islam dan bukan Islam hidup aman di rantau ini.

"Wanita Islam di sini juga menikmati hak mereka di samping melaksanakan tugas yang dinamik dalam masyarakat tanpa menghapuskan identiti dan meruntuhkan maruah mereka berbanding wanita Islam di rantau lain," katanya di sini sempena Simposium Antarabangsa Dunia Islam dan Kerjasama Global: Persiapan Menjelang Abad Ke-21 mulai 25 April ini.

Simposium tiga hari yang dianjurkan oleh Ikim dengan kerjasama Pusat Kajian Islam Oxford akan dirasmikan Perdana Menteri, Datuk Seri Dr Mahathir Mohamad. Berita Harian adalah akhbar rasmi simposium itu.

(END)